

五代史伶官传序

欧阳修

呜呼、盛衰之理、虽曰天命、岂非人事哉。原庄宗之所以得天下、与

其所以失之者、可以知之矣。

庄宗、姓朱邪、名存勖。先世事唐、赐姓李。父克用、以平黄巢功、封晋王。至存勖、灭梁自立、号后唐。○先作总挈。盛衰得失四字、是一篇关键。

世

言晋王之将终也、以三矢赐庄宗、而告之曰、梁、吾仇也、

朱温从黄巢为盗、继而降唐、拜为宣武军节度使、赐名全

忠、未几、进封梁王。竟移唐祚。

燕王、吾所立、

燕王姓刘、名守光、晋王尝推为尚父。守光曰、我作河北天子、谁能禁我。遂称帝。

契乞、丹、与吾约为兄弟、

而皆背晋以归梁。

契丹、耶律阿保机。帅众入寇、晋王与之连和、约为兄弟。既归而背盟、更附于梁。

此三者、吾遗恨也。与尔三矢、

尔其无忘乃父之志。庄宗受而藏之于庙。其后用兵、则遣从事以一少

牢告庙、

羊曰少牢。

请其矢、盛

平声。

以锦囊、负而前驱、及凯旋而纳之。

凯、军胜之乐。○以上叙事。

方

其系燕父子以组、

守光父仁恭、周德威伐燕、守光曰、俟晋王至听命、晋王至而擒之。

函梁君臣之首、

晋兵入梁、梁主友贞、谓皇甫麟曰、李氏吾世仇、理难降之、卿可断吾

首。麟遂泣弑梁主、因自杀。函、以木匣盛其首也。

入于太庙、还矢先王、而告以成功。其意气之盛、可谓

壮哉。一段扬。及仇雠已灭、天下已定、一夫夜呼、乱者四应、仓皇东出、

未见贼而士卒离散、君臣相顾、不知所归。至于誓天断发、泣下沾襟、

何其衰也。一段抑。岂得之难而失之易欤。抑本其成败之迹、而皆自于人欤。

复作虚神、宕出正意、应缴人事。

书曰、满招损、谦得益。忧劳可以兴国、逸豫可以忘身、自

然之理也。

引书作断、应篇首理字。

故方其盛也、举天下之豪杰、莫能与之争。又一段扬、仍用方其字、妙。及

其衰也、数十伶人困之、而身死国灭、为天下笑。

伶人、乐工也。庄宗善音律、或时自傅粉墨、与优人共戏于庭。后为伶人郭从谦所弑。○又

一段抑、仍用及其字、妙。

夫祸患常积于忽微、而智勇多困于所溺、岂独伶人也哉。

结出正意、慨想独远。

起手一提、已括全篇之意。次一段叙事、中后只是两扬两抑。低昂反覆、感慨淋漓、直可与史迁相为颉颃。